



## Walimu Waishike Sheria

### ya Mungu

**S**heria ya Bwana ni kamilifu, Huiburudisha nafsi.—**Zaburi 19:7.**

Popote pale Ezra alipofanya kazi, kulitokea uamsho katika kujifunza Maandiko Matakatiifu. Walimu waliteuliwa kufundisha watu; sheria ya Bwana iliinuliwa na kuheshimiwa. Vitabu vya unabii vilipekuliwa, na kurasa zilizosema juu wa ujio wa Masihi zilileta tumaini na faraja kwa wengi wenye huzuni na mioyo iliyochoka.

Zaidi ya miaka elfu mbili imepita tangu Ezra “alikuwa ameuelekeza moyo wake kuitafuta sheria ya Bwana, na kuitenda,” (Ezra 7:10), lakini kuchelewa kwa wakati hakujapunguza mvuto wa kielelezo chake cha uchaji Mungu. Kwa karne nyingi kumbukumbu ya maisha yake ya kujiweka wakfu yamewatia moyo wengi kwa azimio la “kutatuta sheria ya Bwana, na kuitenda.”

Shauku ya Ezra ilikuwa ya juu na takatifu; katika yote aliyoyafanya alisukumwa na upendo mkubwa kwa roho za watu. Huruma na upendo vilidhihirika kwa wale waliotenda dhambi, ama kwa makusudi au kwa kutojua, inapaswa kuwa somo halisi kwa wote wanaotaka kuleta matengenezo. Watumishi wa Mungu wanapaswa kuwa imara kama mwamba ambao kwa huo kanuni bora zinahusishwa; na bado, pamoja na hayo, wanapaswa kudhihirisha huruma na ustahimilivu. Kama Ezra, wanapaswa kuwafundisha wakosaji njia ya maisha kwa kushauri juu ya kanuni ambazo ndizo msingi wa kutenda haki.

Katika kizazi hiki cha ulimwengu, Shetani akitafuta, kupitia mawakala mbalimbali, kupofusha macho ya wanaume na wanawake dhidi ya madai yao kwa sheria ya Mungu, kuna uhitaji wa wanaume ambao wanaweza kuwafanya wengi “kuitetemekea amri ya Mungu wetu” (Ezra 10:3). Kuna haja ya wanamatengenezo wa kweli, ambao watawelekeza wakosaji kwa Mpaji-Sheria mkuu na kuwafundisha kwamba “sheria ya Bwana ni kamilifu, huiburudisha nafsi” (Zaburi 19:7). Kuna uhitaji wa watu wenye uwezo katika Maandiko, wanaume ambao kila neno na tendo lao huinua sheria za Yehova, watu wanaotafuta kuimarisha imani. Walimu wanahitajika, oh, sana, ambao watachochea mioyo kuheshimu na kuyapenda Maandiko.

Uovu ulioenea sana leo unaweza kwa kiasi kikubwa kuhusishwa na kushindwa kusoma na kutii Maandiko, kwa maana Neno la Mungu linapowekwa kando, nguvu zake za kuzuia tamaa mbaya ya moyo wa asili hukataliwa...

Katika siku za mwisho za historia ya dunia hii sauti iliyonena kutoka Sinai ingali inatangaza, “Usiwe na miungu mingine ila mimi” (Kutoka 20:3). Mwanadamu ameweka matakwa yake kinyume na matakwa ya Mungu, lakini hawezi kunyamazisha neno la amri. Akili ya mwanadamu haiwezi kukwepa wajibu wake kwa mamlaka ya juu. Nadharia na dhana zinaweza kuwa nyingi; wanaume wanaweza kujaribu kuweka sayansi kinyume na ufunuo, na hivyo kuwa mbali na sheria ya Mungu; lakini Amri ina uweza, ni imara na itaendelea kuwa imara, “Msujudie Bwana Mungu wako, umwabudu yeye peke yake” (Mathayo 4:10) (Manabii na Wafalme, sehemu ya 2. uk. 430 – 432).